

ছাত্র সংখ্যা দ্বিগুণ বৃদ্ধি : স্কুল বাড়েনি

নিজস্ব সংবাদদাতা : লালমনিরহাট ১৪ মে।-উত্তরাঞ্চলের ১৬টি জেলায় সরকারী প্রাথমিক বিদ্যালয়ে ছাত্র-ছাত্রী ভর্তির চাপ বাড়লেও বিদ্যালয়ের সংখ্যা বাড়েনি। গত ২১ বছরে এই অঞ্চলে সরকারী প্রাথমিক বিদ্যালয় স্থাপিত হয়েছে মাত্র ২ শ' ৪৮টি। এই সময়ে এলাকার জনসংখ্যা বৃদ্ধি পেয়েছে প্রায় দ্বিগুণ। শিশু মৃত্যুর হার কমেছে। পাশাপাশি ছেলেমেয়েদের লেখাপড়ার প্রতি অভিভাবকদের আগ্রহ বেড়েছে। ফলে গত ২১ বছরে বিদ্যালয় গমন উপযোগী শিশুর সংখ্যাও বেড়ে দ্বিগুণের বেশী হয়েছে।

১৯৭৩ সালে রাজশাহী বিভাগের ১৬টি জেলায় সরকারী প্রাথমিক বিদ্যালয়ের সংখ্যা ছিল ৯ হাজার ১৪টি। এই দীর্ঘ সময়ে বিদ্যালয়ের সংখ্যা মাত্র ২শ' ৪৮টি বেড়ে বর্তমান সংখ্যা দাঁড়িয়েছে ৯ হাজার ২শ' ৬২টিতে। অর্থাৎ গত ২১ বছরে বিদ্যালয় গমন উপযোগী শিশুর সংখ্যা শতকরা একশ' ভাগ বাড়লেও বিদ্যালয়ের সংখ্যা বেড়েছে মাত্র শতকরা ৩ ভাগ। সামগ্রিক অবস্থা বিশ্লেষণে দেখা গেছে, উত্তরাঞ্চলে বেশীরভাগ শিশুই হয় অবহেলিত বেসরকারী বিদ্যালয়ে যাচ্ছে অথবা বিদ্যালয়ে যাওয়ার সুযোগ থেকে সম্পূর্ণ বঞ্চিত হচ্ছে।

১৬টি জেলা শিক্ষা কর্মকর্তা পদের মধ্যে বর্তমানে ১৫টি পদ শূন্য। এছাড়া ৮টি প্রাথমিক শিক্ষা কর্মকর্তার সব ক'টিই শূন্য। একইভাবে একশ' ২৪টি থানা শিক্ষা কর্মকর্তা পদের মধ্যে বর্তমানে ৩৫টি পদ খালি। সহকারী থানা শিক্ষা কর্মকর্তার পদ শূন্য রয়েছে ৯০টি। কর্মচারীর পদও শূন্য রয়েছে বেশ কিছু সংখ্যক।